



JAWAB: Dr Zaliha pada sesi soal jawab lisan di Dewan Rakyat semalam. — Gambar Bernama

VMS, papan iklan LED DBKL papar status cuaca mulai hari ini: Dr Zaliha

KUALA LUMPUR: Semua khidmat Sistem Mesej Pelbagai (VMS) atau papan iklan LED di bawah seliaan Dewan Bandaraya Kuala Lumpur (DBKL) akan memaparkan status semasa cuaca dan amaran kemungkinan banjir kilat bermula hari ini.

Menteri di Jabatan Perdana Menteri (Wilayah Persekutuan) Dr Zaliha Mustafa berkata, langkah proaktif amaran awal itu bagi memastikan rakyat khususnya penduduk Kuala Lumpur dapat bersedia dan mengambil langkah awal kemungkinan berlaku bencana banjir kilat.

“Untuk usaha ini kita mendapat kerjasama daripada MetMalaysia (Jabatan Metrologi Malaysia) dan juga JPS (Jabatan Pengairan dan Saliran). Langkah ini kita akan dimulakan dengan papan iklan LED di Menara DBKL terlebih dahulu,” katanya pada sesi soal jawab lisan di Dewan Rakyat semalam.

Beliau menjawab soalan Teresa Kok (PH-Seputeh) yang bertanyakan tentang langkah DBKL untuk mencegah dan menangani banjir kilat di Kuala Lumpur serta senarai projek pembangunan yang telah diluluskan DBKL di kawasan persekitaran kolam takungan banjir sejak 2014.

Dr Zaliha berkata, DBKL turut menubuhkan Jawatankuasa Pengurusan Insiden Awam Kuala Lumpur bersama beberapa agensi lain sebagai langkah bantuan segera dalam tempoh kurang

30 minit daripada waktu terima amaran awal banjir jalan atau banjir kilat di Kuala Lumpur.

Agensi terlibat ialah Angkatan Pertahanan Awam (APM), Polis Diraja Malaysia (PDRM), Jabatan Bomba dan Penyelamat dan Jabatan Pengairan dan Saliran Kuala Lumpur (JPSKL).

Sementara itu mengenai isu kolam takungan banjir, Zaliha berkata terdapat lapan projek pembangunan telah diluluskan di kawasan persekitaran kolam takungan banjir di Kuala Lumpur sejak 2014 melibatkan Kolam Taman Wahyu, Kolam Delima, Tasik Metropolitan Kepong dan Tasik Damai Lake Fields.

“Berdasarkan pemantauan di DBKL di kawasan-kawasan projek sekitar kolam takungan banjir yang telah diluluskan, didapati paras air masih dalam keadaan terkawal dan masih belum pernah berlaku kejadian banjir di situ,” katanya.

Dalam perkembangan lain, Zaliha turut menjelaskan kejadian lubang benam di Jalan Masjid India yang berlaku pada 23 Ogos lepas, tidak ada hubungan secara langsung dengan banjir kilat di sekitar Kuala Lumpur.

B a g a i m a n a p u n , katanya sebagai langkah pencegahan lubang benam di Kuala Lumpur, DBKL melaksanakan kajian struktur tanah yang dipantau pasukan petugas khas sejak insiden itu berlaku dan proses kajian kini dalam peringkat akhir.

— Bernama